



Mess op Kölsch 2025
„Jedem Dierche sing Pläsierche“
mit den DOMSTÄDTERN

Domstädter zom Engang

Lit. Bejrößung un e paar Wöd zom Anfang:

P.: Loß mer anfange met nem Jroß an de Herrjott. Uns röf zosamme der Vatter, der Son un der Hellige Jeis. Unser Herrjott soll immer met üch sin! **Alle: Un och met Dir et janze Levve.**

Leed zom Anfang: „Melodie: Un wenn et Trömmelche jeht“

1. Jede Woch am Sunndach dat es allen klor, treffe mir uns en d'r Kirch beim Herrjot fürm Altar, all die Chresteminsche stonn dann en de Reih, och der kleenste Panz der weeß: ich jehüür dobei. Ref.: Wenn uns de Kirchejlock dann rööf, dann stonn mer all parat un mer trecke in de Kirch, de Jlock, hätt unsjesaat: Jott lädt uns en, uns en, Jott lädt uns en.
2. Immer widder Sunndachs fünfzich mol un mieh, trecke mer he en d'r Kirch – danke op de Knie. Singe „Halleluja“, Sanctus, Gloria! Un mir freue uns wie jeck: dä Här es wunderbar. Ref.

Glorialied: „Huus voll Leech und Levve“

1. E Huus voll Leech und Levve hät uns der Här jebaut; kann jeder jot dren levve, dä op der Här vertraut. Här, meer ihren Dich, loß uns en dingem Huus doch finge Freud un Trus.
2. Jeit alles deer dernevve, do denks, do bess am Engk, dann lääch janz stell di Levve dem Herrjott en de Häng. Här, meer lovven Dich, Här, meer ihren Dich, loß uns en dingem Huus doch finge Freud un Trus.

Zweechejesang: „Taizé-Halleluja“ (1.+2. Strophe)

1. Sitt nit so lahm, krempelt üch de Maué huh, späut en de Häng, packt ens met aan. Lück bruchen ich, die en minge Wingberch jonn. Halleluja, Halleluja.
2. Maat kei Jeseech, loort nit möffich en de Rund, laacht met dem Mung, laacht mem Hätze. Freud muß ück spingkse us jedem Knopploch rus. Halleluja, Halleluja.

EVANJELIUM

P.: Unser Herrjott soll immer met Üch sin. **Alle: Un och met Dir et janze Levve.**

P.: Us dem Hellije Evangelium noh... **Alle: Här, mer priese Dich un Ding Woot.**

P.: Dat wor et Evangelium vun unserem Här, Jesus Christus. **Alle: Mer lovven unsen Här.**

Noh dem Evangelium: „Taizé-Halleluja“ (3. Strophe)

3. Ehr sitt ming Fründe, mi Rich, dat eß et ör, dat schenken ich üch op Äde. Jläuvt nor aan mich, deent met Fumm us vollem Hätz. Halleluja, Halleluja.

Prädig

Noh der Prädig: Domstädter:

„Stammbaum“

Ich wor ne stolze Römer, kom met Caesar's Legion,
un ich ben ne Franzus, ich kom mem Napoleon.
Ich ben Buur, Schreiner, Fescher, Bettler un Edelmann,
Sänger un Gaukler, su fing alles aan.

**Refrain: Su simmer all he hinjekumme,
mir sprechen hück all dieselbe Sproch.**

Mir han dodurch su vill jewonne.

Mir sin wie mer sin, mir Jecke am Rhing.

Dat es jet, wo mer stolz drop sin.

Ich ben us Palermo, braat Spaghettis für üch met.

Un ich ich wor ne Pimock, hück laach ich met üch met.



Ich ben Grieche, Türke, Jude, Moslem un Buddhist,
mir all, mir sin nur Minsche, vür'm Herjott simmer glich
Su simmer all he hinjekumme,
mir sprechen hück all dieselve Sproch.
Mir han dodurch su vill jewonne.
Mir sin wie mer sin, mir Jecke am Rhing.
Dat es jet, wo mer stolz drop sin.
De janze Welt, su süht et us,
es bei uns he zo Besök.
Minsche us alle Länder
ston bei uns hück an de Thek.
M'r gläuv, m'r es en Ankara, Tokio oder Madrid,
doch se schwade all wie mir
un söke he ihr Glöck.

Refr.

Förbedde:

V.: Jott un Vatter: **Alle: Mir bedden Dich: hör uns an.**

zor Jabenbereitung: Domstädter: „Amazing Grace“

Zur Präfation:

P.: Unser Här soll met Üch sin. **Alle: Un och met Dir.**

P.: Wo es Uhr Hätz? **Alle: Et es beim Här zo Hus.**

P.: Lot uns dem Här danke sare. **Alle: Do han mier allen Jrund zo.**

Leed zom Sanktus: Domstädter

Hellich, hellich, hellich, hellich es der Här!

Hellich, hellich, hellich, hellich es nor hä!

Hä, dä nie bejonne, hä, dä immer wor,
iwich es un waltet, hä bliev luuter do.

Hellich, hellich, hellich, hellich es der Här!

Hellich, hellich, hellich, hellich es nor hä!

Allmaach, Wunder, Leev, alles runderöm!

Hellich, hellich, hellich, hellich es der Här!

HOCHGEBET



Noh der Wandlung:

P.: Dat es dat Deefste vun allem, wat mier jläuve: **Alle: Mier welle üvverall vun Dingem Dut verzälle und voll Freud rofe, dat do nie em Dut jebleve bes – un dat esu lang, bes Do widderküß en Herrlichkeit.**

Vatter unser:

P.: Mer wäde Kinder Jottes jenannt un dat simer och. Doröm dörfe mer voll Vertraue zo unserem Vatter em Himmel bedde:

Alle: Unse Vatter em Himmel, Dinge Name welle mier hellich halde. Di Rich loß zo uns kumme. Alles soll esu sin, wie Do et hann wells, em Himmel un op der Äd. Jevv uns hück un alle Daach, wat mier bruche, för zo levve. Un dunn uns verjevve, wammer Unrääch jedonn hann, wie och mier denne verzeihe welle, die uns Unrääch dunn. Halt von uns fän wat uns schade künnt, un dunn uns vör allem Schläächte bewahre. Do beß je Künig en Iwischkeit. Amen.

P.: Un no jevvt üch de Hand un fangkt mem Fridde aan.

Lamm Gottes:

Alle: Här, Do häß wie e unschöldich Lamm de Sündeschold vun der janze Welt ob Dich jeladde. Och uns Sünd dröck Dich nidder. Här, dunn uns doch verjevve.

Alle: Här, Do häß wie e unschöldich Lamm de Sündeschold vun der janze Welt ob Dich jeladde. Och uns Sünd dröck Dich nidder. Här, dunn uns doch verjevve.

Alle: Här, Do häß wie e unschöldich Lamm de Sündeschold vun der janze Welt ob Dich jeladde. Och uns Sünd dröck Dich nidder. Här, jevv uns Dinge Fridde.

P.: Loort he, et Joddeslamm, dat op sich nimmp de Sündeschold vun der janze Welt.

Alle: Här, ich han et nit verdeent, dat Do bei mich küß, ävver ei Woot von Deer mäht Liev un Siel widder fruh!

Domstädter zor Kummelion

Leed zor Danksagung: Domstädter: „Du bes die Stadt“

Du bes die Stadt op die mir all he ston
Du häs et uns als Pänz schon anjedon
Du häs e herrlich Laache em Jeseech
Du bes die Frau die Rotz un Wasser kriesch



Jrau ding Hoor, un su bunt die Kleid
Du häs Knies en d'r Bud, doch de Näjele rut
Jrell jeschmink, un de Fott jet breit
E Jlöck, dat dir dat all jot steit

Du bes die Stadt op die mir all he ston
Du häs et uns als Pänz schon anjedon
Du häs e herrlich Laache em Jeseech
Du bes die Frau die Rotz un Wasser kriesch



Frech wie Dreck. doch et Hätz es jot
E klei beßje verdötsch, met nix jet am Hoot
Jot jelaunt, das et bal schon nerv
All dat han mer vun dir jeerv

Du bes die Stadt op die mir all he ston
Du häs et uns als Pänz schon anjedon
Du häs e herrlich Laache em Jeseech
Du bes die Frau die Rotz un Wasser kriesch

Du bes die Stadt am Rhing, dem jraue Storm
Du bes verlieb en dinge staatse Dom

Du bes en Jungfrau un en ahle Möhn
Du bes uns Mam un du blievs iwich schön
Du bes uns Stadt un du bes einfach schön

Säje:

P.: Unser Herrjott soll immer met Üch sin. **Alle: Un och met Dir et janze Levve.**

P.: Joddes Sän, dä mer bruche för Liev und Siel, för Levve und Sterve, soll met uns sin: DÄ SAN VUM VATTER UN VUM SON UN VUM HELLIE JEIS.

P.: Joht (irjendwann) hem en Fridde! **Alle: Dank sei Jott, dem Här.**

Schlussleed: „Mer wellen dem Herrjott singe“ (Melodie: Mer losse d'r Dom en Kölle"

Ref. Mer wellen dem Herrjott singe, bevür mir jon noh Huus, e Dakleed für dem Säje, hä jit uns met zom Schluß. Mir wolle dem Herrjott singe e Dankleed jetz zom Schluß. Un dann jon mir fruh op heim, mir all he, jroß u klein, un dann jon mir fruh op heim, mir all he, jroß un klein.

Stellt üch vör, die Freud von Hück wör alle Dach bei mir un üch em Hätze janz deef dren. Un stellt üch vör, watt dann d'r Här em Himmel laach. Dat levve hät für uns dann vell mie Senn. Ref.

Stellt üch vör, mir wör'n och en de Kirch bedaach, nit nur janz zo lore un zo sin. Un stellt üch vör, et wöd mieh en d'r Kirch jelaach. Ich jläuv, ihr meind bestemmp: Nä, wör dat schön! Ref.

Dröm wolle mir jet vun d'r Freud vum Fasteleer erüvver rett en für die Zick donoh. Dat wör bestemp em Senn vun unsem Himmelshär, wenn Minsche danzten laachend durch et Johr. Ref.

Noh der Mess

- Vorstellung der Plaggen
- Dank an alle Beteiligten

Domstädter zom Auszug:

Domstädter Marsch

„Am Dom zo Kölle“

1. Am Dom zo Kölle, zo Kölle am Ring,
doh klinge de Glocke, su prächtig un
 fing.

Se dun uns sage, wat all mer gehatt,
et jov doch op Äde kein schönere Stadt.



Die Stroße un Gäßcher, die Hüschke apaat,
dren wor noch e Levve vun äch kölscher Aat.
Wat hammer jesunge, als äch kölsche Fetz.
Uns leev klölsche Mädcher, wor jet für et Hätz.

Am Dom zo Kölle, zo Kölle am Ring,
doh klinge de Glocke, su prächtig un fing.
He welle mer blieve, he sin mer zo Huus,
he kritt uns kein Düvel, kein Düvel eruus.

2. Am Dom zo Kölle, zo Kölle am Ring,
doh klinge de Glocke, su prächtig un fing.
Se dun uns mahne, an fröhre Zick,
un loße uns ahne, wat fän lit un wick..



De Wolke se wandere, am himmlische
Zelt,
wie schön wor uns Kölle, wie schön wor
de Welt.
Stolz fahre de Scheffe om Rhing fruh
dohin,
die Zauberpraach jov et nur eimol ze sin.

Am Dom zo Kölle, zo Kölle am Ring,
doh klinge de Glocke, su prächtig un fing.
Göv Gott singe Säge, dat uns bliev die
Stadt,
wo jeder op Äde sing Freud doch dran
hatt.



Noh der Mess jitt et och jet ze drinke...

**KÖLLE
ALAAF**